

मार्निंग डोगरी न्यूज बुलेटिन, समे. 09.20 Hrs

<><><><><><>

Headlines

1. राष्ट्रपति द्रौपदी मुर्मू होर 79में स्वतंत्रता दिवस दी पूर्व संध्या पर अज्ज राष्ट्र गी संबोधित करडन।
2. समूलचा राष्ट्र कल आजादी आहले ध्याड़े दा जश्न मनाग, प्रधानमंत्री नरेंद्र मोदी ऐतिहासिक लाल किले दी प्राचीर परां राष्ट्र गी संबोधित करडन।
3. लेफ्टिनेंट गवर्नर मनोज सिन्हा होरें आखेआ ऐ जे इस बरे दी श्री अमरनाथ जी दी जातरा दा कामयाब आयोजन, निस्वार्थ सेवा दी स्हाड़ी बचनबद्धता ते तरक्की-बाददे दी बतें पर अगड़े बधैं करदे भारत दा प्रतीक ऐ।
4. जम्मू-कश्मीर दा संस्कृति विभाग 1947 दी बंड दे सरबंथै च अज्ज मनाए जा'रदे विभाजन विभिषिका स्मृति दिवस बारै अज्ज जम्मू दे कला केन्द्र ते श्रीनगर दे टैगोर हाल च बशेश कार्यक्रमें दा सरिस्ता करा'रदा ऐ।
5. मौसम विभाग नै जम्मू संभाग दे कई हिस्सैं च कल्लै तोड़ी भारी थमां बड़ी भारी बरखा बरने दी चेतावनी जारी कीती ऐ।

<><><><><><>

President

राष्ट्रपति द्रौपदी मुर्मू होर अज्ज 79में स्वतंत्रता दिवस दी पूर्व संध्या उप्पर राष्ट्र गी संबोधित करडन। एह संबोधन संझा 7 बजे थमां आकाशवाणी दे सभ्भनें राष्ट्री नेटवर्क उप्पर प्रसारित होग। एह दूरदर्शन दे सभ्भनें चैनलें पर हिंदी ते अंग्रेजी च प्रसारित होग। एहदे मगरा दूरदर्शन दे क्षेत्रीय चैनलें आसेआ क्षेत्रीय भाषायें च बी एहदा प्रसारण कीता जाग। आकाशवाणी अपने सरबन्धत क्षेत्रीय नेटवर्क उप्पर रातीं साइडे 9 बजे थमां इलाकाई भाषायें च एहदा प्रसारण करोग।

<><><><><><>

PM-I-Day

राष्ट्र कल 79मां स्वतंत्रता दिवस मना'रदा ऐ ते प्रधानमंत्री नरेंद्र मोदी होर दिल्ली दे लाल किले थमां इस समारोह दा नेतृत्व करडन। मोदी होर ऐतिहासिक धरोहर दी प्राचीर थमां राष्ट्री तिरंगा चाढ़डन ते राष्ट्र गी संबोधित करडन। राष्ट्र 2047 तगर विकसित भारत दे सरकारी विजन गी साकार करने दी दिशा च तेजिया कन्नै अगगे बधा'रदा ऐ। इससै लेई इस ब'रै समारोह दा विषे ऐ-“नमां भारत”। एह समारोह इक समृद्ध, सुरक्षित ते साहसिक नमें भारत दे निरंतर उदय दा चेता करने ते प्रगति दी बता उप्पर अगड़े बधने लेई नमी उर्जा प्रदान करने दे इक मंच दे रूप च कम्म करोग।

<><><><><><>

LG-Felicitation Langer Committee

लेफ्टिनेंट गवर्नर मनोज सिन्हा होरें आखेआ ऐ जे इस ब'रै दी श्री अमरनाथ जी दी जातरा दे कामयाब आयोजन ते सभ्भनें सरबन्धत धड़ें दे मजबूत जज्बे नै एह दस्सी दिता ऐ जे अस्स

दुनिया च कुसै कोलां बी पिच्छे नेई ऐं। एल.जी होरें आखेआ जे अमरनाथ जातरा दा कामयाब आयोजन, निस्वार्थ सेवा दी स्हाड़ी बचनबद्धता ते तरक्की-बाददे दी बतै पर अगड़े बधै करदे भारत दा प्रतीक ऐ। एल.जी सिन्हा होरें एह गल्ल कटड़ा दे आध्यात्मिक विकास केंद्र च लंगर संगठनें गी सम्मानित करने लेई लोआए गेदे इक कार्जक्रम गी संबोधित करदे होई एह गल्ल आक्खी। उनें गलाया जे अमरनाथ जातरा नै एह संदेश दिता ऐ जे भारत दे जज्बे गी कोई बी शिकस्त नेई देई सकदा। एल.जी होरें बाबा अमरनाथ शरदालुएं दी निस्वार्थ सेवा लेई लंगर संगठनें दी बड़ी मती सराहना कीती।

<><><><><><>

CS-KKGs

मुख्य सचिव अटल डुल्लू होरें राई-बाई मैहकमे गी एह हुकम रसाल कीता ऐ जे ओह किसान खिदमत घरें गी ग्राएं च तगड़े बहुउद्देशी केंद्रें दे तौर पर विकसित करन तां जे एह केंद्र समूलचे जम्मू-कश्मीर च करसाने लेई सकारात्मक तब्दीलियां आहनने आहले महत्वपूर्ण इदारे साबत होडन। प्रदेश दे सब्भनें जिलें च किसान खिदमत घरें दे कम्मकाज दा जायजा लैने आस्तै कल लाई गेदी इक्क उच्ची सतह दी बैठका दी प्रधानता करदे होई मुख्य सचिव होरें इस पैहलकदमी गी असाधारण प्रोग्राम करार दिता जेदा बिचार राश्ट्री स्तर दे माहिरें आसेआ दिता गेदा ऐ। उनें आखेआ जे एह पहलकदमी राई-बाई खेतर दे तेजिया कन्ने विकास ते करसाने गी जागरूक बनाने दी पूरी-पूरी समर्थ रखदी ऐ। किसान खिदमत घरें दी अनौखी भूमिका पर लौस पांदे होई मुख्य सचिव होरें आखेआ जे हर इक्क करसान परिवार थमां घट्टोघट्ट इक्क सदस्य नेय केंद्र कन्ने पक्क गै जुड़े दा होना लोड़चदा।

HGT-Udhampur/Rajouri

उधमपुर दे सलाथिया चौक दी वार्ड नंबर 6 च 62 फुट उच्चा राश्ट्रीय झंडा फहराया गेआ ऐ। इसी उधमपुर-रियासी रेंज दे D.I.G Sarah Rizvi ते उधमपुर दिएं डिप्टी कमिशनर सलोनी राय होरें राश्ट्र गी समर्पित कीता। इस मौके पर डीआईजी ते डीसी होरें राश्ट्री झंडा फहराया। उनें उधमपुर दे लोकें गी एहदे लेई मुबारकबाद दिती। डिप्टी कमिशनर होरें जानकारी दिती जे हर घर तिरंगा अभियान दा मकसद नागरिकें गी तिरंगा झंडा अपने घर आहिनए उसी फहराने लेई प्रेरित करना ऐ।

तोआई, राजौरी दे जिला प्रशासन आसेआ कई सारी तिरंगा रैलियें दा आयोजन कीता गेआ। एहदे च समाज दे सब्भनैं वर्गे हिस्सा लैता। राजौरी दे डिप्टी कमिशनर अभिषेक शर्मा होरें एसएसपी हुंदे कन्नै कोटरंका थमां इक्क Horse रैली गी झंडी दस्सियै रवाना कीता। इस मौके लोकें अपने हत्थें च झंडे फगड़े दे हे ते मानै कन्नै रैली च शामिल होए। मगरा डिप्टी कमिशनर होरें इक होर तिरंगा रैली गी टूरिस्ट रिसेप्शन केंद्र थमां रवाना कीता। एहदे च 7 जहार नागरिकें हिस्सा लैता।

Partition Remembrance Prog

जम्मू-कश्मीर दा संस्कृति विभाग 1947 दी बंड ते उस दौरान लक्खें लोकें गी जरनी पेदी तकलीकें गी उजागर करने लेई अज्ज जम्मू दे कला केन्द्र ते श्रीनगर दे टैगोर हाल च बशेश कार्यक्रम दा सरिस्ता करा'रदा ऐ। विभाजन विभीषिका स्मृति दिवस दे रूपै च एह कार्यक्रम दौने थाहें परी अज्ज दिनै 11 बजे शुरु होग। इस कार्यक्रम दे दुरान ऐतिहासिक फोटूएं दी इक नमैश लाई जाहग जेहदे राहें बंड दुरान लोकें गी झल्लनी पेदी तकलीकें गी दर्शाया जाहग। इस पैहलकदमी दा मकसद युवा पीढ़ी गी 14 अगस्त दे ध्याड़े बारै जानकारी बनाने दे कन्नो-कन्नी बंड दुरान तकलीफां झल्लने आहलें गी श्रद्धांजलि देना बी ऐ। विभाजन विभीषिका स्मृति दिवस दे सरबंध्यै च आकाशवाणी समाचार कन्नै चेचे तौर पर गल्ल करदे होई मन्ने-परमन्ने दे इतिहास, लखारी ते राजनीतिक विश्लेषक प्रोफेसर हरि ओम होरें आखेआ

<><><><><><>

Prog. Announcement

इस्सै सरबंध्यै च आकाशवाणी जम्मू दे क्षेत्रीय समाचार एकांश आसेआ अज्ज “विभाजन विभीषिका स्मृति दिवस” दे मौके पर 25एं मिनटें दी इक विशेष परिचर्चा दपैही 12 बजे प्रसारित कीती जाहग। इस विशेष कार्यक्रम च स्हाड़े परौहने होडन मन्ने-परमन्ने दे इतिहासकार, लखारी ते राजनैतिक विश्लेशक प्रो. हरिओम ते पी.टी.आई दे जम्मू ब्यूरो चीफ अनिल भट्ट, जेड़े 1947 च भारत ते पाकिस्तान बंशकार होई दी बंड बारै अपने माहिराना बचार सांझे करडन। इस कार्यक्रम दा संचालन करडन साढ़े न्यूज एंकर जगमोहन शर्मा। एह कार्यक्रम तुस मीडियम

वेव 303 मीटर यानि 990 किलोहर्टज़ ते एफ.एम 100 अशारिया 3 मेगाहर्टज़ उप्पर बी सुनी सकदे हो।

<><><><><><>

Drug-Awareness Prog

केंद्री गृह मंत्री हुं'दे आसेआ जारी निर्देशें मताबक नशे दी रोकथाम सरबंधी ब्यूरो आसेआ 15 ते 16 अगस्त गी नशे दी रोकथाम लेई इक राश्ट्रव्यापी जागरूकता अभियान दा आयोजन कीता जा'रदा ऐ। इस मुहिम दा मकसद लोकें गी नशीले पदार्थें दे माड़े असर बारें जागरूक बनाना ते "नशामुक्त भारत" दे संकल्प गी लेइयै सब्भनै गी किट्ठे आहनना ऐ। इस दरान मुख्य भरै दे बक्ख-बक्ख शिक्षा संस्थानें च नशा बरोधी अभियान तैहत कार्यशाला, सेमिनार, पोस्टर बनाना, निबंध लेखन, प्रतियोगिताएं, नुक्कड़ नाटक ते सैकल रैली ज्नेही गतिविधियें दा आयोजन करोआया जाहग तांजे लोकें, खास करियै नौजवानें दी, भारत गी नशामुक्त बनाने लेई सक्रिय भागीदारी जकीनी बनाई जाई सकै।

<><><><><><>

Heavy-Rains

मौसम विभाग नै जम्मू संभाग दे कई हिस्सैं च कल्लै तोड़ी भारी थमां बड़ी भारी बरखा बरने दी चेतावनी जारी करदे होई लोकें गी गुजारिश कीती ऐ जे ओह् इस सरबंधै च लोड़चदी एहतियात बरतन। आकाशवाणी दे जम्मू संवाददाता दी रिपोर्ट मूजब मैहकमे नै आखेआ ऐ जे खिते दे कई इलाकें च इस दरान बद्दल घनोए दे रौहडन ते हौली थमां दरम्याने दर्जे दी बरखा

बरग। मौसम विभाग नै जम्मू खिते दे कई जिलें, जियां रियासी, उधमपुर, जम्मू, साम्बा, कठुआ, डोडा ते राजौरी च भारी थमां बड़ी भारी बरखा दे असार जताए न। मौसम विभाग नै किश इलाकें च चानचक्क हाड़ आने, ल्हास-पस्सियां पौने ते प्हाड़ें परा कुप्पड़ पौने दी शेंका बी जाहिर कीती ऐ। किश थाहरें पर अंधी झक्खड़ झुल्लने ते शमानी बिजली मिलकने दे असार बी दस्से गे न।

<><><><><><>

PAC-AIIMS Jammu Visit

विधायक शाम लाल शर्मा हुंदी प्रधानता तैहत सार्वजनिक स्हाब-लेखें सरबन्धी कमेटी नै कल विजयपुर आहले एम्स अस्पताल दा दौरा लाइयै उत्थे मरीजें लेई उपलब्ध ढांचागत ते सेहत दिक्खभाल स्हूलतें दा जायजा लैता। एम्स जम्मू दे कार्यकारी निदेशक ते सी.ई.ओ शक्ति कुमार गुप्ता ते बक्ख-बक्ख विभागें दे प्रमुखें एम्स च ढांचागत ते होरनें विकास गतिविधिं बारै इक्क ब्यौरेवार पावर प्वाइंट पेशकारी कीती। उनें एम्स अस्पताल च सेहत दिक्खभाल स्हूलतें दी दस्तयाबी ते मरीजें दे बेहतर इलाज-मुआलजे लेई गतिविधियें सरबन्धी रूप-रेखा बारै जानकारी सांझी कीती। कमेटी दे सदस्यें एह मेद बुज्झी ऐ जे एम्स अस्पताल च मरीजें, खास करियै दूर-दरेडे दे पच्छेत्तरे इलाकें थमां औने आहलें गी निर्विघ्न ढंग्गै नै बेहतरी सेवां उपलब्ध होडन।

<><><><><><>

Subordinate Leg Committee

विधाई उपसभा समिति दी श्रीनगर च कल इक बैठक लग्गी। इस दरान राजस्व मैहकमे आसेआ बनाए गेदे नियम कनूनें दा जायजा लैता गेआ। एहदी अध्यक्षता कमेटी दे अध्यक्ष हसनैन मसूदी होरे कीती। इस दरान राजस्व मैहकमे दे बक्ख-बक्ख नियमें दा व्यापक आंकलन कीता गेआ। इस दरान जमीन सरबन्धी मुआवजे, प्रभावित लोकें दी पुनाबहाली ते होर दुए कम्मै दा जायजा लैता गेआ। चेयरमैन होरे लोकें दी भलाई-बेहतरी, बरोबरी ते न्याऽ प्रति जमीन सरबन्धी कनून दी अमलावरी पर जोर पाया।

<><><><><><>